

## 10/2016 UDALEKO OSOKO BILKURA

### 2016KO AZAROAREN 28AN IZANDAKO OHIKO OSOKO BILKURAREN AKTA

#### BERTARATUTAKOAK:

##### ALKATEA

Pedro M<sup>a</sup> Estanga Lasa (EH Bildu taldea)

##### ZINEGOTZIAK:

Aratz Luisa Urkola (EH Bildu taldea)

Izaskun Jauregi Saizar (EH Bildu taldea)

Josune Eizmendi Manterola (EH Bildu taldea)

Bakarne Olano Manzano (EH Bildu taldea)

Iñaki Merino Castro (EAJ taldea)

Kepa De la Iglesia Sánchez (EAJ taldea)

##### BITARTEKO IDAZKARIA:

Pedro M<sup>a</sup> Odriozola Zubizarreta

Anoetako udaletxean, 2016ko azaroaren 28an arratsaldeko zazpiak direla, eta ondorio horretarako deia egin ondoren, Udaleko Ohiko Osoko Bilkura antolatu da, Pedro M<sup>a</sup> Estanga Lasa Alkatearen Lehendakaritzapean, eta Pedro M<sup>a</sup> Odriozola Zubizarreta jauna, Bitarteko Idazkari lanetan aritu naiz.

Francisco Berbel Perez eta Jose Ignacio Otermin Garmendia zinegotziak ez dute ezin etorria adierazi.

#### 1.- 2016KO EKAINAREN 27AN, ABUZTUAREN 31EAN, URRIAREN 10EAN, AZAROAREN 2AN ETA AZAROAREN 23AN OSPATURIKO UDAL PLENOAREN BILKUREN AKTAK ONESTEKO PROPOSAMENA.

2016ko ekainaren 27ko, 2016ko abuztuaren 31ko, urriaren 10eko, azaroaren 2ko eta azaroaren 23ko udal plenoaren bilkuren aktak aho batez onartu dira.

#### 2.- EBAZPENEN BERRI EMATE, 2016KO EKAINAREN 16TIK AZAROAREN 15A BITARTE, 213 ZENBAKITIK 356 ZENBAKIRA, BIAK BARNE.

2016eko ekainaren 16tik 2016ko azaroaren 15a bitartean izaniko ebazpenen berri ematen du alkate jaunak, udal batzarkideak jakinaren gainean geratuz.

#### 3.- UDALBILTZAREN ALDEKO APORTAZIOA DELA ETA, 277/2016 SENTENTZIAREN BERRI EMATEA.

Ikusirik 225/2014 Prozedura Laburtuan, EAEko Auzitegi Nagusia Administrazioarekiko Auzien Salak emaniko 277/2016 zenbakia duen sententzia:

Demandatzailea: Estatuko Administrazioa (Gobernuaren Ordezkaritza Euskal Autonomi Erkidegoan).

Demandatua: Anoetako Udala eta Udalbiltza Partzuergoa.

Gaia: “2014ko martxoaren 3ko alkate dekretuaren aurkako errekurtsio; dekretu honen bidez Udalbiltza“ Parzuergoari 3.000 euroko ekarpen ekonomikoa egitea erabaki zen.

Eta bertan ondorengo **EPAIA** ematen dena, Udalbatzako kideak jakinaren gain geratuz:

*“Que debemos desestimar y desestimamos el recurso de apelación nº 1019/2015 formulado por la Abogada del Estado en representación de la Delegación del Gobierno en la Comunidad Autónoma del País Vasco frente a la Sentencia nº 165/2015, de 29 de julio, dictada por el Juzgado de lo Contencioso-Administrativo Nº 1 de Donostia-San Sebastián, en el Procedimiento Abreviado nº 225/2014, que confirmamos. Con preceptiva imposición de las costas causadas en esta instancia a la recurrente.”*

#### **4.- GIPUZKOAKO UR KONTSORZIOAREN ESTATUTOEN ALDAKETA.**

2016ko azaroaren 9an 1342 zenbakidun sarrera erregistro duen ondorengo idatzia jaso zuen Anoetako Udalak, Gipuzkoako Ur Kontsorzioaren izenean Iñigo Eloisegi Zuzendari-Gerenteak sinatuta:

*“27/2013 Legeak, abenduaren 27koak, Toki Administrazioaren arrazionalizazioa eta jasangarritasunari buruzkoak, 30/1992 Legea, azaroaren 26koa, Herri Administrazioen Araubide Juridikoaren eta Administrazio Prozedura Erkideari buruzkoaren hainbat artikulua aldatzen ditu, hogeigarren xedapen gehigarri bat sartuz:*

- 1. Kontsorzio bakoitzaren estatutuek zehaztuko dute ze Herri administraziotara atxikia egongo den, halaber bere erregimen organikoa, funtzionala zein finantzakoa hurrengo ataletan aurreikusitakoaren arabera.*
- 2. Ondorengo lehentasun irizpideen arabera, ekitaldi ekonomikoaren lehen eguneko egoerari dagokiolarik, kontsorzioa atxikia geratuko da, aurrekontu ekitaldi bakoitzean eta epe horretarako, honako herri Administrazioari:*
  - a) Gobernu batzordean botoen gehiengoa duena.*

*Gure kasuan administrazio hori Gipuzkoako Foru Aldundia da.*

*Hortaz, estatutuen hirugarren artikulua honela idatzita geratuko litzateke:  
3º Artikulua Nortasuna eta gaitasun juridikoa*

- 1. Kontsortzioak berezko nortasun juridikoa du eta jarduteko gaitasun osoa bere helburuak betetzeko.*
- 2. Sektore Publikoaren Araubide Juridikoari buruzko urriaren 1eko 40/2015 Legearen 120. artikuluan ezarritakoaren xedeetarako, Kontsortzioa Gipuzkoako Foru Aldundiari atxikia geratzen da. Foru Arauak atxikitze horren edukia eta norainokoa zehaztuko du.*

*Gipuzkoako Ur Kontsortzioko Batzar Nagusiak 2016ko urriaren 27an ospatutakoak, aipatutako aldaketa hasiera batean onartu zuen.*

*Bestalde, behin betirako onartu dadin, eta Gipuzkoako Lurralde Historikoko udalez gaindiko erakundeak arautzen dituen apirilaren 10eko 6/2007 Foru Arauaren 23. artikulua arabera, beharrezkoa da udal kontsortzio kideek ere, osoko bilkuraren erabakiaren bitartez, aipatutako aldaketa onartzea.*

*Beraz, eskatzen dugu zure udalak egingo duen datozen Osoko Bilkuretako batetan, Eguneko Gai Zerrendan sartua izan dadila onartzeko, egoki bada, Gipuzkoako Ur Kontsortzioaren Estatutuen aldaketa.(...)*

Aipatutako proposamena bozketara eraman eta aho batez onartu da.

## **5.- ETXEZ ETXEKO LAGUNTZA ZERBITZUAREN ADMINISTRAZIO KONTRATUA ESLEITZEKO PROPOSAMENA.**

Ikusirik Udaltzarak 2016ko urriaren 10ean eginiko bilkuran "Etxez Etxeko Laguntza" zerbitzua kontratatze espedientea abiaraztea erabaki zuela, prozedura irekiaren bitartez eta espedientea presazko bezala deklaratu.

Ikusirik emandako epean bi enpresa hauei dagozkien proposamenak aurkeztu direla:

- Eulen, Servicios Sociosanitarios, S.A.
- Garbaldi, S.A.

Ikusirik Eskaintzen irekierako akta, 2011ko uztailearen 7koa.

Ikusirik Udal Gizarte Langileak eginiko txostena, non Eulen, Servicios Sociosanitarios, S.A. baltzuari esleitzearen alde informatzen den, lizitazioa araupetzen duten Baldintza Pleguan ezarritako eskakizunak betetzen dituelako.

Kontratazio Mahaiak 2016ko azaroaren 21ean esleipenaren proposamena Eulen, Servicios Sociosanitarios, S.A. baltzuren alde eginik.

Ikusirik Udalbatzak 2016ko azaroaren 28an eginiko bilkuran Antonio Rufo Gómez jaunari, Eulen, Servicios Sociosanitarios, S.A. baltzuaren ordezkari, eta "Etxez Etxeko Laguntza" zerbitzua kontratatzeke Kontratuaren esleipendun proposatutakoari, lizitazioa araupetzen duen Baldintza Pleguen 23. klausulan adierazitako dokumentazioa 3 lanegunen epean aurkezteko eskatu ziola, aurkeztutakoen artean proposamenik abantailatsuen bera zelako "96,4553 puntu" lortuz, Garbialdi, S.A. baltzuak "91,50 puntu" lortu zituen bitartean.

Ikusirik interesatuak eskatutako dokumentazioa eta eskatutako 5.500 euroko fidantza 2016ko azaroaren 28an aurkeztu dituela.

Ikusirik bitarteko Idazkari Kontu-hartzaileak eginiko txostena.

Honakoa erabaki da batzarkide guztien adostasunarekin:

Lehenengoa.- Antonio Rufo Gómez jaunari, Eulen, Servicios Sociosanitarios, S.A. baltzuaren ordezkari gisa, Anoetako udaleko "**Etxez Etxeko Laguntza**" zerbitzuaren kontratazioa esleitzea 18,84 euro/orduko prezioan, BEZ barne, ohiko arreta, eta 22,63 euro/orduko, BEZ barne, igande eta jaiegunetako arreta, lizitazioa araupetu duten Baldintza Ekonomiko-Administratibo eta Teknikoen pleguen arabera, bai eta espedientean jasotzen den esleipendunaren eskaintzaren arabera.

Bigarrena.- Eulen, Servicios Sociosanitarios, S.A baltzuko ordezkariari 15 lanegunetako epea eman Anoetako Udalera bertaratu dadin administrazio kontratua formalizatzeraz. Kontratua sinatu aurretik hurrengo agiriak aurkeztu beharko ditu:

- Langileen osasun zaintzaren ziurtagiriak. Langileen hizkuntza gaitasunaren egiaztapenak. Agiriz egiaztatzerik ez balego Anoetako Udaleko Euskara zerbitzuaren bitartez egingo da.
- Lizitazioaren iragarkien Gastua ordaindu izanaren egiaztagiria (149,38 euro).

Hirugarrena.- Eulen, Servicios Sociosanitarios, S.A baltzuari 2011. urtean Etxez Etxeko Laguntza zerbitzuaren kontratua bermatzeko jarri zuen bermea itzultzea.

Laugarrena.- Akordio honen jakinarazpena egin kontratazio prozesuan parte hartu duten lizitatuak guztiei eta bere argitalpena agindu Anoetako Udalaren kontratatzailearen perfilean.

Bosgarrena.- Kontratuari jarraipena egiteko udaleko Gizarte Langilea kontratuaren arduradun izendatzea, eta zentzu honetan, akordio honen jakinarazpena helaraziko zaio.

Seigarrena.- 3/2011 Errege Dekretu Legegileak 29. artikuluan xedatutakoa betez, kontratua formalizatu ondoren dokumentuaren kopia ziurtatu bat Herri Kontuen Euskal Epaitegira bidaltzea.

**6.- MOZIOA: “AZAROAREN 25A, EMAKUMEEN KONTRAKO INDARKERIA EZABATZEKO NAZIOARTEKO EGUNA”.**

EH Bildu talde politikoak deialdiarekin batera banatu den ondorengo mozioa aho batez onesten da:

*Azaroaren 25ean ozenki aldarrikatu behar dugu emakumeen kontrako indarkeria mota guztien aurka gaudela eta, hori ez ezik, indarkeria sorrarazten duten eragile guztien aurka ere bagaudela. Bizitza aske, seguru eta burujabeak eraikitzearen alde gaudelako.*

*Indarkeria matxistaren alderdi desberdinak identifikatzen jarraitzeko eguna da, jendartean normalizatuena dauden sotilenetatik hasita, hala nola ukitzeak; ahozko lizunkeriak; publizistek eta mass-mediak emakumeen gorputzari ematen dieten erabilerak; mezu eta adierazpen sexistak; janzkera, jendarte-sareen erabilera edo lagunartea kontrolatzea, eremu publikoa (eskolako patioak, jolastokiak, parkeak) askatasunez okupatzeko zailtasunak; edota emakume eta gizonen arteko berdintasuna zuzenean erasotzen dituzten administrazio-erabakiak. Bigarren estadio batean, sexu-erasoak eta eraso fisikoak egongo lirateke, eta, esparrurik bortitzenean, erailketak.*

*Feminismoak, eta beraz, gure jendarteak, arrakasta handia lortu zuen indarkeria matxista politizatu genuenean, eta, horrenbestez, etxeko gai pribatu bat izatetik jendartearen eta politikaren arlora zabaldu genuenean. Hain zuzen ere, agi geratu denean indarkeria matxistaren jatorria ez dagoela gizon biolento batengan edo burua galdu duen gizon batengan, berdintasunik eta orekarik gabeko jendarte-harreman jakin batzuetan baizik.*

*Eta horren harira norbaitek esan lezake egun inoiz baino lege, zerbitzu, salaketa eta politika publiko gehiago dauzkagula eskura indarkeria matxistari aurre egiteko, eta hori egia da. Alabaina, indarkeria hori ez da inondik inora murrizten ari, eta indarrean jarraitzen du gure jendartearen eremu guztietan.*

*Horregatik esaten dugu desorekak indarrean jarraitzen duen bitartean indarkeria matxista hor egongo dela, botere-harreman desorekatu horiei eustea delako, hain zuzen, indarkeria horren funtsa. Hortaz, emakumea izate hutsagatik indarkeria jasateko aukera txikiena dagoen bitartean, gure herrian ez dugu bakea edo normalizazioa lortuko.*

*Horregatik guztiagatik esan dezakegu urte luzetako borrokari esker lortutako berdintasun formala ez dela nahikoa une honetan, eta aurrera jarraitu behar dugula, mikro eta makroindarkeria guztiak identifikatuz eta indarkeria sortzen duten eragileak banan-banan agerian utziz. Eta erantzukizuna emakumeen gainean jarri ordez, beren burua babesteko eta ez arriskatzeko eskatzen baitiegu, edozein eraso sexista sorrarazteko edo sahiesten laguntzeko gai diren gizonen gainean jarriz.*

*Berdintasunetik gertuago dagoen beste maskulinitate bat eraiki beharra, jendarte patriarkal hau eraldatu beharra eta subjektibitatea aldatzea aldarrikatu nahi dugulako, emakume eta gizonei buruzko baliospenetan oinarritutako hierarkizazioak ezabatuz.*

*Indarkeria matxista gainditzeko borrokatu beharko dugulako, maskulinitate tradizionalak ezabatu eta desegin beharko ditugulako, adostasun berriak eraikiz, enpatiatik, sororitatetik, aukeratzeko askatasunetik, segurtasunetik, arduratik, berdintasunetik eta elkarrekikotasunetik.*

*Horregatik guztiagatik, Anoetako Udalaren EH Bilduko taldeak honako mozioko haurkeztu nahi du, Osoko Bilkuran eztabaidatu eta ondoren onartua izan dadin.*

#### *PROPOSAMENA:*

*1.- Anoetako Udalak 2017ko aurrekontuetan berdintasun-partida handitzeko konpromisoa hartzen du, aurrekontu orokorrak izango duen igoeraren neurri berean edo handiagoan igoz.*

*2.- Anoetako Udalak tokiko talde feminista eta emakumeekin elkarlanean, prebentzioko Udal plan integrala garatuko du, indarkeria matxistaren adierazpide guztiei aurre egiteko modukoa, horretarako beharrezkoak diren baliabide ekonomiko eta tekniko guztiak aktibatuz.*

*3.- Anoetako Udalak tokiko talde feminista eta emakumeekin elkarlanean, eraso matxisten kontrako protokoloa indartuko du, horretarako beharrezkoak diren baliabide ekonomiko eta tekniko guztiak aktibatuz.*

*4.- Anoetako Udalak Foru Aldundiari eta Emakunderi eskatzen die emakume eta gizonen arteko berdintasunaren alorreko aurrekontu-partidak handitzeko, berdintasun-zuzendaritzak sendotzeko, epaitegietako genero-unitateak indartzeko eta indarreko legeria berraztertzeke konpromisoa hartzeko.*

*5.- Erakunde honetatik, hau da, Anoetako Udaletik, borroka feministaren alde hartu dugun konpromisoa berretsi nahi dugu, indarkeriarik gabeko jendarte demokratiko bat eraikitzeke bide eta tresna nagusia den heinean.*

6.- Erakunde honetatik, hau da, Anoetako Udaletik, bat egiten dugu mugimendu feministak azaroaren 25erako deitutako mobilizazioekin, eta jendarte osoari ere dei egiten diogu mobilizazio horretan parte har dezan.”

## 7.- ERAKUNDE ADIERAZPENA: “ZER EGIN DEZAKET NIK EUSKARAREN ALDE?”

EH Bildu talde politikoak deialdiarekin batera banatu den ondorengo erakunde adierazpena aho batez onesten da:

*“Zer egin dezaket nik euskararen alde?”*

*Euskararen Nazioarteko Eguna, 2016*

*Adierazpena*

*Abenduaren hirua pozik bizitzeko eguna dugu euskaldunok. Duela berrogei urte arte gizartean gainbehera zihoan euskara hazkunde nabarian jarri dugu. Batik bat belaunaldi zaharrenen hizkuntza izatetik, belaunaldiarteko hizkuntza eta, batez ere, gazteen hizkuntza izatera pasatu da. Ingurune jakin batzuetara mugatuta egotetik sekula bereak izan ez dituen esparru sozialetan ere nor izatera. Europako hizkuntza zaharrena izatetik, hizkuntza modernoa eta gaur egungo gizartera egokitua izatera.*

*Euskara bizitzen ari den zabalkundea gizarte osoaren nahi eta ahaleginari esker gertatu da. Norbanako askoren eta kolektibo askoren ekimenari esker. Jende askoren eskuzabaltasunari esker. Gizarte osoak proiektu kolektibo gisa bereganatu izanari esker. Konpromiso publiko eta pribatuari esker. Gizartearen adostasunari esker.*

*Hizkuntza-elkarbizitza gizarte-elkarbizitzaren osagai egin dugu, gizarte-kohesioaren funtsezko elementu. Hizkuntzen berdintasuna eta norbanakoaren hizkuntza-hautua herritar guztion aukeraberdintasunaren oinarrian jarri ditugu.*

*Euskararen Nazioarteko Eguna badugu, baita ere, indarberritzeko eguna. Izan ere, gaur egun, oraindik, bi hizkuntza ofizialen berdintasun sozialetik urrun gaude. Euskarak eta gaztelaniak, erabilerari dagokionez, legezko aitortza berdina dute, baina gizartean egoera desberdina bizi dute.*

*Horregatik, urratsak ematen jarraitu nahi dugu. Bi hizkuntza ditugu ofizialak Euskal Autonomia Erkidegoan. Baina helburu izaten jarraitzen du, gizartean oro har, hizkuntzen arteko berdintasun sozialera iristeak. Hizkuntza-aniztasunaz harro gaudelako eta euskararekin munduko hizkuntzaaniztasunaregiten diogun ekarpenaz ere harro gaudelako. Hizkuntza-aniztasunak gure gizartea aberasten duelako, euskarak hizkuntza-aniztasuna aberasten duelako eta, beraz, gutako bakoitza aberasten*

*gaituelako. Euskara, Etxeparek esan bezala, plazan nahi dugu, indartsu eta sendo nahi dugu bere lurralde guztietan.*

*Euskara hizkuntza erabilia eta bizia izatea: horra gure helburua. Guztion gogoia eta ahalegina eskatzen dituen helburua; helburu ilusionagarria; denoi dei egiten digun helburua: norbanakoei eta kolektiboei, herri aginteei, alderdi politikoei, langileen sindikatuei, enpresari-elkarteei, kirol, aisialdi nahiz kultur arloko elkarteei, gizartearen arlo desberdinetako erakundeei, eta abarri. Gustuko dugun helburua da, gustura hartzen dugun konpromisoa.*

*Horregatik, herri aginteok eta askotariko gizarte-eragileok elkar hartuta ospatu nahi izan dugu aurten Euskararen Eguna. Euskara eta hizkuntza-elkarbizitza sendotzeko konpromiso bat hartu nahi izan dugu, nork bere neurrikoa, nork bere ahalaren araberakoa. Horretarako, gure buruari galdera bat zuzendu diogu: “Zer egin dezaket nik euskararen alde?”.*

*Adierazpen honen sinatzaileok galdera horri erantzun propioa eman nahi diogu, gure esparruan euskara modu edo neurri batean zein bestean indartzeko erantzun bat.*

*Era berean, herritar guztiak eta gizarte-eragile guztiak gonbidatu nahi ditugu galdera hori bera egitera eta nork bere neurriko erantzuna hausnartzera, guztion ekarpenak baitira baliagarri eta onuragarri euskararen biziberritzerako eta guztion arteko elkarbizitza sendotzeko.*

*Ospa dezagun, bada, pozik eta harro Euskararen Nazioarteko Eguna. Eta bizi dezagun aurrera begira euskara, gure artean eta egunerokoan, hizkuntza bizia eginez, “Zer egin dezaket nik euskararen alde?” galderari erantzunez eta galdera bera euskal gizarte osoan zabalduz.”*

## **8.- GALDE-ERREGUAK**

Bat ere ez.

Eta beste aztergairik ezean, Alkate Jaunak amaitutzat eman du bilkura, arratsaldeko zazpiak eta hamar minutu direnean; guzti honetaz, nik, Bitarteko Idazkariak, fede ematen dudalarik.